

CARTA HEBREOWE'SH JÏI

Dyusa' cue'shtyi we'wec tyajy Nchi'ca's caajrra

1 ¹Dyusa' tyāniitey cue'sh yatsgawe'shtyi maanzcuēe usva we'wec fiyfiyrraj tyajy yuwee pta'shsawe'shtyi jycaajrra. ²Sa' āchj naa nmej ensu' Dyusa' cue'shtyic we'we tyajy Nchi'ca's caajrra. Dyusa' tyajy Nchi'ca's jycaajrrac naa quiwe quījquijnava jyuca vit. Tyā'wē yūurrac Dyusa' tyāatyi's jyuca Nchi'c cuseterrarrāa nvijt. ³Tyāa Nchi'c íc Ney zhichcue zmeena' cweetjnisa yu', sa' Dyus ma'wēsate' le'chcuerrāa yujva fíysamée tyāa írrāac yu'. Sa' tyāa írrāa naa quiwe ma'c yuu nava quījquijnava jyuca ewrrāa caafi'nze'jna ūsa' tyajy we'weni yacjrrāa. Sa' tyāa írrāa cue'sh pcaltyi yaaterra Dyus pucate cachcu cielute.

Dyus Nchi'ca' angeleswe'shte tjaacue walasa'

⁴Dyus Nchi'ca' angeleswe'shte tjaacuec walasa yu', tyāasac Ney ūsni yase jypa'ga maa angeleswe'shteva tjaacue walasa. ⁵Tyā'wēte írrāac Dyusa' bagachte yujva angeleswe'shtyi' maa yujtyva na'jīna we'wemée:

Indya' andy Nchi'cngu,

Tyāa pa'gatj ityi yuuwa'ja's āchja' vit jīme'.

Sa' tyā'wēy maa angel yujnava na'wē we'weme':

Andya' tyajy Ney yu'nja,

Atsa' tyā' andy Nchi'c yuuna jīme'.

⁶Nava Dyusa' tyajy Nchi'ca's nyafyrraj naa quiwete nuyquijrra', na'wēc we'we:

Dyus angeleswe'sh jyucaysa tyā'srrāana nwēese'jwa'j ji'pjta' jīnac jycaaj.

⁷Sa' angeleswe'sh fi'nzewa'ja's yu' na'wērrāac we'we:

Angeleswe'sha' wejya na'wē vyaawa'jsa vitnisata',

Sa' Dyus jycaajny selpiina ipy beesa na'wē vyaana yuuwa'jsa vitnisata' jī'c.

⁸Nava Nchi'c fi'nzewa'ja's we'werra yu' na'jī'c:

Dyus, iindy jycaajna ūswa'ja' bagachteva nes yuuna,

Indya' ew yuurráa jycaajna ūswa'jsang.

- 9 Sa' ewmeesa yu'sa' jypa'gamée, ewsa yuurrá'sngu pacue.
Tyāa pa'gac iindy Dyusa' iindy wēt fi'nzewa'ja's iiméj wala pees,
Naa quiwete iindy nwe'shte jytjaacue jī'c.
- 10 Vite ajcjē' na'jī'c Dyus Nchi'ca's we'werra':
Indyngu quiwe's pjeu'j nyafyte,
Sa' cieluva iindy cuseju vitnisata'.
- 11 Nava tyā'wēsa' ptsuutyna, naapcachja' indya' bagachteva nes
yuune'nga.
Quījquījva jyuca ropa na'wērráa iishityna.
- 12 Atsa' jyuca yu'ptjejni yuutyna.
Nava indy yu' bagachteva tyā'wēsa nes yuune'nga.
Iindy ityi fi'nzeni' bagachte yujva ptsumeena jī'c.
- 13 Nava Dyusa' maa angeleswe'sh yujtyva tyā'wē yu' na'jīna we'weme'
bagachterrāa yujva:
Andy pucate patsu ju'ngte mcaach,
Indyna atsesa maatyva jyuca indyrrarrāana nwēese'jwa'ja's vitna
jyā'pjcach jīme'.
- 14 Jyucay angeleswe'sha' cue'sh na'wē cacue ji'pjmeesa naa quiwete
maarrāj ewte neeyūuwa'jsa ūstyna tyāawe'shtyi pu'chya' caajnisarrāata'.

Ewte neeyūuwa'ja's jypa'yajcymée yu' yuuwa'jme'

2 ¹ Tyāa pa'ga wala jypa'yacywa'j ji'ptja'w, na'wē Dyus Nchi'c yuu
cue'shtyi we'wete yuwe ewsa's wēse'tja'w tyāajū tyuteeya'mée.
² Dyus yuwe's angeleswe'shrrāa pta'shni yujva iishiini yuumée cyteycu
yuu. Tyāa pa'gairráaty nwēese'jmée pcalte wetesawe'sha' castigāyni yuu
tyāawe'sh ājmée yūupa'ga. ³ Tyāarrāa yujva cyteycu yuu, atsa' cue'sh ewte
neeyūuwa'j tyacue walasa's Dyus Nchi'c Cristo tyajy yuweju yuuc pta'sh
tyā'sa' jypa'yacymeerra', ¿ma'wē Dyus castigo seena'sajū iyucytja'w? Atsa'
Cristo pta'shni's nyafyte wēse'jsawe'sha' cue'shtyity pta'sh, isasa yuja'
jīna. ⁴ Tyāawe'shrrāa isasa yuja' jīmeeta', Dyus yuuc isasa yujna sūjna
jiyucajn quim yujva ājanimeesa's caavya'ja'j. Sa' Dyus Espiritu pu'chte
quijte yujva shiingmée selpiina fi'nzewa'jty ūscu techsa na'wērrāj, tyajy
ūs wēeni yu's jyuca.

Jesucristo' cue'sh yacj pyacjsa na'wēc yuu

⁵ Na'wē Cristorrarrá's nwēese'jwa'j en pa'jana jī'tja'w tyāa ente
jycaajwa'ja's angeleswe'shtyi nvijtme' Dyusa'. ⁶ Tyā'wē meec yu'
tyajírrāac na'jīna teech ajcjē pta'shi' Dyus librute:
Nasa' ¿ma'wēsana atsnga tyā'sa' peeygāja'?
Nasa ptsuwa'lsarrá's ¿quījya'nga tyacue wala pa'pchuna yaaqui'?
⁷ Nasa's manz en yu' angeleswe'shte ājmeecuesa na'wēng nvijt,
Nava jytjaacue walasa yuuwa'j vitrang nvijt,

Tyā'wē yūurra iindy vitnityi' tyāarrarráa jycaajya' ājawa'ja's ūsngu.

⁸ Quījva jyuca tyāarrarrá's nwēese'jwa'ja's vitngu jī'c.

Dyusa' tyā'wē jyuca tyāarrarrá's nwēese'jwa'ja's vit yā'jrra', quīj yujva nwēese'jwa'jasamée yu' nviytme!. Tyā'wēteva āchpcach tyāarrarrá's quījva jyuca nwēese'jni yu's iuymetja'w. ⁹Na'wē manz en yu' angeleswe'shte ājmecuesa vitcu tyā' Jesusa' tyā'snac Dyusa' cue'sh jyucaysa pa'gate uuwa'jsa vit. Nava āchja' Dyus pucate u'pa', tyāarrarráa jycaajwa'jsa yuurra tyā'wē pytjaa yuurra uupa'ga.

¹⁰ Quījquijnava jyuca vit-sa Dyuscu tyajy luuch yuuwa'jsa yuutyi' jyuca nwe'werra tyajy tashte nuypa'jya' Jesucristo's pytjaa yuurra uuwa'j vit, quijte yujva shiingmée nwe'wesa yuucajn. ¹¹ Tyā'wē pcaltyi peltunāynisa vite' pcaltyi peltunāysa tyāa yacj e'nzsa' teech Neytewe'shrrarráata' tyāa Neyā' Dyusa'. Tyā'wē teech Neytewe'shrráa ne'tca'w, tyāa pa'gac Dyus Nchi'ca' cue'shtyi's tjaamemée Andy nyacj jīna we'we!. ¹² Tyā'snac Dyus librute na'jī':

Indy ma'wēsateva andy nyacjwe'shtyi pta'shi'nja,

Sa' andy nyacjwe'sh cshavyte indya's wechana tuutje'je'nja jī'c.

¹³ Sa' vite ajcjēva na'wēc we'we!:

Andyā' Dyusráana yajcyna fi'nze'nja.

Sa' qui'quin we'werra':

Dyus ūsni luuch ayte ūsta' tyāa yacj ayte ūstju jī'c.

¹⁴ Nasava pyacjsa jīnisa' maanzcuēerrava cyanzī teech ney cacue pety ee jypa'garra yuurráaty pyacjsa yu', tyāa pa'gac Jesusva pyacjsa yuuya' nasaa cacue's jypa'ga uuya' ājaya'. Tyā'wē yūurrac cluuste uurra uuwa'j vit-sa's cnay. Tyā'wē nasaty uuwa'j vit-sa' echtjē'cj yu!. ¹⁵ Tyā'wē yūurrac Jesusa' jyucaysaty nwe'we bagachteva uuwa'ja's ūucjna yuurráa fi'nzenijū. ¹⁶ Tyā' angeleswe'shtyi pu'chya' quījme', wejyva nasa Abrahan jiljtycu pu'chya' quīj. ¹⁷ Tyā'wē nasaty pu'chya' ājaya'c cue'sh na'wēsa yuu quījteva jyuca. Tyāasac nyacj na'wē yuuna pa'jrra cue'shtyi peeygāawa'ja's jī'pjurra pcalsawe'sh pa'gate Dyus tashte we'wewa'jsa yuu. Sa' nasaa pcaltyi jyuca peltunāyya'c pytjaa yuurra uuwa'j jī'pjuna ūsu!. ¹⁸ Tyā'wē nasaa cacue's jypa'garrac pcalte cue'sh chjāchjamée fi'nzeni's jyuca jiyu. Tyāasa āchja' pcalte chjāchjamée fi'nzesatyi's quijte yujva shiingmée nwe'weya' ājawa'jsa!.

Jesusráa Moiseeste tjaacuesa'

3 ¹ Yacjtjē'jwe'sh i'cue'sha' Dyus pa'yanisa i'cue yuu tyāa jīi yuuwa'jsa, tyāa pa'ga wala ew mjyyuwe Cristo Jesusa's. Tyā' Dyus caajnisā', pcalsawe'sh pa'gate Dyus tashte we'wewa'jsa, sa' Dyus yacj cue'sh fi'nzewa'ja's pta'shsa!. ² Jesusa' quījteva jyuca cytey yuuc ma'wē yūuwa'ja's ne' Dyus jycaaj tyā'sa' jyuca. Moisesva ma'wēga Dyus luuchtyi jype'jwa'ja's jyuca cytey yuu, tyā'wēyuc Jesusva cytey yuu. ³ Nava Jesusráa

Moiseste tjaacue jytujtjesa', ma'wēga yat namurráa jytujtje yu' atsa' yatte selpiisáa yu' jytujtje meec yu', tyā'wēy Jesusrráa jytujtjesa'. ⁴Yata's quimrráava tyajte yujc yat yuuna pa'ja', nava namu yu' Dyusa'. ⁵Moisesa' selpiisaarráarrava tyā'wēc quíjite yujva peejymée jyuca cytey yuu Dyus luuchtyi jype'ljna, nava tyajy selpiini yu' e'su Dyus quíj yūuya'vateva tyāaty caajiyu'jsarráac yu'. ⁶Naapcachja' Cristo' selpiisamée Dyus Nchi'c yuuc yu', tyāasa Dyus luucha' cue'shtja'w tyāaty quíjite yujva peejymée jype'jwa'jsa', cue'sh yuu uu entepcach tyutemée tyā's yuurráa wechana fi'nzete yu'.

Dyus luuch, Dyus tashte jycaasena ūswa'j

⁷Tyāa pa'ga tyāa yacjrráa fi'nzewa'ja's na'wēc pta'shi' Dyus Espiritu':

Āchj Dyus we'weni's wēse'lyā'jrra',

⁸I'cue'sh ūuste wa'l yaacynuwe. I'cue'sh yatsgaweshva na'wēty wa'lna ūsu' tyā'wē yūunuwe.

Tyā'wē wa'lrra tyāawe'sha' Dyusa's cvissaty na'wē yuu nasa u'pnmée quiwete.

⁹I'cue'sh yatsgaweshva' cytee ūsrra',

Tyacue cuarenta añupcach tyāawe'shtyi andy quíjquíjiteva ew yūuna pu'chni's uyrrava,

Andyas wa'ltyi.

¹⁰Tyāa pa'gatj tyāa nasa yacj wēt fi'nzeya' ājameerra na'ljina we'we:

Andy caapiya'jni's wa'lrra, tyāawe'sh ūuste jypumbanarráaty fi'nze'.

¹¹Atsa' tyā'wē yūupa'ga, tyāawe'sha' andy yacj jycaasena ūswa'tje u'cameetya jinatj jurāy jī'c.

¹²Tyāa pa'ga, yacjtjē'jwe'sh, wala mpa'yajcywe, tyā'wē Dyus we'weni' wej yujva isameesana sūjna ewmée yajcyrra Dyus ityisa tashu tyuteeya'mée. ¹³Tyā'wē yūumée, jweefírráa chjāchja yaacywa'ja's een isa puuty pu'chna mfi'nzewe, cyaj i'cue'shtyi' maa yujtyva pcala' caypumba'jmeena, atsa' i'cue'sh ūuste ewmée yaacywa'ja's jī'pjumeene'cue. ¹⁴Nyafíiva ma'wētca'w Cristo yacj jypumbamée fi'nze tyā'wēesa nmej entepcach fi'nzerra', tyāa yacj ūswa'ja's jī'pju'nja'w.

¹⁵Tyā'wē wa'lcajmen na'wēc we'we':

Āchj Dyus we'weni's wēse'lyā'jrra',

I'cue'sh ūuste wa'l yaacynuwe. I'cue'sh yatsgaweshva na'wēty wa'lna ūsu' tyā'wē yūunuwe jī'c.

¹⁶¿Quimta tyā'wē Dyus yuwe's wēse'jrrava e'su yā'ja' wa'lna ūsu'? Egipto quiwejú Moises cutyi'cj tyāawe'sh jyucaysaty tyā'wē yūu. ¹⁷Dyusa' ¿quim yacjga cuarenta añupcach pyūuscuete fi'nzena ūsu'? Pcalte wetepa'ga nasa u'pnmée quiwete uuty tyāawe'sh yacjcu tyā'wē pyūuscuete fi'nzena ūsu'. ¹⁸Dyusa' ¿quimtyiga tyā'wē andy yacj jycaasena ūsya' u'cameetya jina we'we? Nwēese'lsameetycu tyā'ljina we'we. ¹⁹Dyus we'weni's nwēese'jmeerra', u'caya' ājameeta' tyā'sa' āchja' jiyutja'w.

4 ¹Tyāa pa'ga wala jypa'yaquiga. Tyā'wēme!, i'cue'shva maafi yu' iviituvá'cue Dyus yacj jycaasena ūswa'tje pa'l'jwa'ja's ji'pjrrava. ²Tyāawe'shtyiva ma'wēga jycaasena ūswa'tje pa'l'jwa'ja's pta'shni yuu, tyā'wēy cue'shtyiva pta'shnic yuu Dyus yuwe ewte nviitwa'ja's. Nava tyāawe'shtyi' tyāa pta'shni' selpiime!, Dyus yuwe! isa cytey yuuwa'jsana sūjna ūusuj jyuca nwēese'jmeeta' naa pa'ga. ³Dyus we'werra: Andy yacj jycaasena ūswa'tje u'cameetyna jīna jurāycu. Nava cue'sh yu' pejca u'cawa'jsatja'w, Dyus yuwe! isa yujna sūjnatja'w jypa'garra nwēese'j naa pa'ga. Na'wē andy yacj jycaasena ūswa'l'j jīna we'wec tyāa yu' nyafiitey naa quiwe's vitna jyā'jrra jycaasec, sa' āchpa'l'jwa jycaasena ūsa' cyte u'cawa'ja's we'werrac tyā'l'ji'. ⁴Tyajy mjīia's vitna jyā'jrra jycaaseni's Dyus librute na'jīnac we'we'!

Dyusa' tyajy mjīia's jyuca jyā'jrra', siete ensa's jycaasec ji'c.

⁵Sa' cyte tyajy jycaaseni's we'werrac:

Andy yacj jycaaseya' u'caya' ājameetyna jī'.

⁶Macue tyā'wēteva, maafi yu' cytee jycaasena ūswa'tje u'catyna. Nyafiive'sha' ewte neeyūuwa'ja's pta'shte wēse'jrrava, Dyusa's nwēese'jmerra jycaasena ūswa'tje u'cameeta'. ⁷Tyā'wē yūuni en scjēwniijū wala tyachtec Dyusa' Davida's na'jīna cwe'we'l'j:

Āchj Dyus we'weni's wēse'jyā'jrra',

Wa'l'na nwēese'jmée yu' yuunuwe ji'c.

Tyāa yu' āchj naa ensuwe'shva tyā'wēy yūuwe'shtec tyā'l'ji'. ⁸Jycaasewa'l'j jīna we'we'c tyāa jycaasewa'ja' Josué entewe'shvatsa', Dyusa' e'su tyachte qui' we'wewa'jmeene' yu' āchj jīna. ⁹Tyāa pa'ga jycaasewa'l'j tjaacue ewsa nee ūsīrrá' Dyusa's nwēese'jsawe'sh jīi. ¹⁰Tyāa pa'gatey Dyus yacj jycaasewa'tje u'casa' tyāawe'sh mjīiniijū jyucatec jycaase', Dyusva ma'wēga tyajy mjīini's jyā'jrra jyucate jycaase tyā'wēy. ¹¹Tyāasa Dyus yacj jycaasewa'tje u'caya' pa'pchuwa'l'j ji'ptja'w, Dyus we'weni's nwēese'jmeeta' tyāawe'sh na'wē yūumée.

¹²Tyā'wēme!, Dyus we'weni' ityisa', quījteva jyuca seelpisa. Dyus we'weni' chill pdyi'p seena' zecsate jytjaacue zecsá', tyāasac ūus dyiite quīj pcal ji'pjteva jyuca āate cpajcywe'we'. Sa' ūusterráa yaacyni quīj yujnava paatste nviitu'tsme!. ¹³Dyus vitnisa' quīj yujva tyajy dyi'pte paatste unymeete yu' neeyūumeetyna. Quījquījva jyuca āaterrarráa ūsta' cue'shtyi castigāywa'jsa ūsa' tyajy dyi'pte.

Dyus tashte pcalsawe'sh ju'ngu we'we pu'chsa' Jesusa'

¹⁴Dyus Nchi'c Jesus tyā'wē Dyus tashte cue'sh pcalsawe'sh ju'ngu we'we pu'chwa'jsa cielute u'cac, tyāa pa'ga tyajy tashuj tyutemée fi'nzega. ¹⁵Tyāa pa'gatey cielute cue'sh ju'ngu yuusa' tyāa yu' pcalte yu' wetemeerrava, pcalte cue'sh chjāchjamée fi'nzeni yu'sa' jyuca jiyuc, tyāasa cue'sh ājmeecuesaty jyuca peeygājna pu'chwa'jsa'. ¹⁶Tyāa pa'ga Dyus tashte ūucjmée utyaaga, Dyus peeygāni's ji'pjurra cue'sh tjēyte fi'nzenijū nwe'weni yuuya' quīj enteva.

5 ¹Pcalsawe'sh ju'ngu we'we pu'chwa'jsa tyjityjrra naa quiwete nviitnisa' tyāa íírráa pcalpa'ga tajcy icjrra Dyus altalte cambwa'jsa'. ²Pcalsawe'sh ju'ngu we'we pu'chsa' tyāa ííva pcalte ñuste fi'nzesarra', ñuste fi'nzeni ma'wēteva jyuca jia'. Tyāasa jiimeecuesa vituna fi'nzesaty wala peeygājna ju'ngu yuwa'jsa'. ³Sa' tyāa ííva ājmeeceue pcalsarra', peecy pcalpa'gava tajcy icjrra Dyus altalte cambwa'j jip'ju'c, vitesa pa'gateva tyā'wēy.

⁴Pcalsawe'sh ju'ngu we'we pu'chwa'jsa' nasaa pwe'shrráa yajcyrra qui'pnisa yu'tsmeeta'. Tyāawe'shtyi' Dyuscu tyjityjrra nviitu', Aaronva ma'wēga Dyus tyjityjnisa yuu tyā'wēy. ⁵Atsa' Cristova tyā'wēy yūunisafírráac yuu. Tyā' peecyrráa yu' pcalsawe'sh ju'ngu Dyus tashte we'wesa yuume'. Tyā'sa' Dyuscu tyjityjrra nvijt. Tyajíic Dyus libruveva na'jī':

Dyus we'werra':

Indya' andy Nchi'cngu,

Tyāa pa'gatj ityi yuwa'ja's āchja' ūs jīnac we'we'.

⁶Sa' vite ajcjēva Dyus libruveva na'jīnac we'weni yuu:

Indya' pcalsawe'sh ju'ngu Dyus tashte we'we pu'chwa'jsang
bagachteva,

Melquisedecva ma'wēga yuu tyā'wēysa jī'c.

⁷Cristo' naa quiwete ūsrra', tyajy uwa'j en jyuca utyaatste', Dyus nwe'weya' ājawa'jsa dyi'pte wala pytjaa sus neewe'wec ū'nená, atsa' Dyusa' wēse'cj tyajy pytjaa we'weni's. ⁸Cristo' macue Dyus Nchi'crrava, iiméj wala pytjaa yuwa'ja's jiyurra, nwēese'jwa'ja'sva piyac. ⁹Tyā'wē quīj pytjaa yuunisateva jyuca jiyuna jyā'jrrac, bagachteva nwe'wena nes yuwa'jsa yuuna pa'j jyucaysa nwēese'jsa yuutyi's. ¹⁰Tyā'wē yūunijūc Dyusa' pcalsawe'sh ju'ngu we'we pu'chwa'jsa vit, Melquisedec na'wēysa.

Dyusa's jiirra tyajū tyuteete' ūucjūcjsa'

¹¹Na'wē pta'shi'tj tyā'sa' wala we'wewa'j jip'jīrráatj, nava i'cue'sha' jiyuya' āja'tsmeei'cue, atsa' wala tjēya' ew pta'sh wēete yu'. ¹²Dyusa's jiyuni tyacue tyachte', i'cue'sh yuu caapiya'jsa yuupcachte, nee peejiírráa i'cue Dyus caapiya'jni tjēymeecuesa's qui' peena ew pta'shwa'j. I'cue'sha' luuch na'wēysarráa i'cue, quīj ū'a'sva ū'wepcachte, luuch ū'ni lechi'srráa i'cue ū'we'. ¹³Tyā'wē lechirrá's ū'sa' luuch le'hcue cchu'chu'jnisa na'wēsarráata', tyāasaty Dyus yacj ew fi'nzewa'j yu'sa' jiyu'tsmée. ¹⁴Nava tjē'jsa yā'ja' tjē'jsa ū'nisaty jypa'gawa'ja', quīj ewsatyna vite' quīj ewmeesatyna nava tyāaty jyuca jiyuya'.

6 ¹Tyāa pa'ga Cristo caapiya'jni nyafyte tjēymeecuesaty pta'shtja'w tyāa yacjrráa fi'nzemée, jweeíírráa wala piyana ul'jwa'j jip'tja'w, shiingna fi'nzeya'mée. Nyafyte caapiya'jnisa yacjrráa yu' fi'nzemeeyuuga. Tyā' naata': pcaltyi nvijjrra Dyus tashte shawendni, Dyusa' ūsyujna sūjna

ūsuj jyuca yaacyni, 2 yu'te ya'bautisāyni, Dyusna selpiwa'jsaty tyjityjrra Dyus cusete neewe'weni, qui' ityi yuuwa'ja's caapiya'jni, Dyus castigo iiméj seena'te pa'jwa'ja's pta'shni, tyāa nyafyfe caapiya'jnīsata!. 3 Dyus pu'chte' jweeírráa piyana u'jue'nja'w.

4 Tyā'wēme!, maava Dyus yacj fi'nzewa'ja's ew jiisa, Dyus peescu ewte neeyūwa'ja's tyā'snava ew jiisa, Dyus Espiritu'sva ūuste jypa'gasa, 5 tyā'wēy Dyus yuwe ewsateva jiisa, nmej ente' Cristorrarráa jycaajwa'ja'sva jiisa, 6 tyā'wē quíjteva ew jiisa Dyus tashuj tyutesaati' peena caashwendu'j wēete ya'āja'tsme!. Tyāa pa'gatey tyāawe'sha' Dyus Nchi'ca's ew jirrava ajtsena weechrra cluuscjé qui' qui'psa na'wē yuusata' naa pa'gac ya'āja'tsmée. 7 Tyāawe'shtyi' na'wētja'w caaja'nda'ja': Quiwe mjīnisa' nus pa'jni yu'a's jyuca chanzhate!, uutjash ewsac caseje!, Dyus pu'chte mjīisawe'sh jii. 8 Nava ewsa casejmée jyūtj quíjte yujva seelpimeesarráa buchate!, quiwe tyā'wēsa's nmejte' tjengnimée yuuna. Tyā'wēy maava Dyusa's jirra qui' tyutesá' quíjte yujva seelpmíe, iviituni yuutyna.

Dyusa' cytey yuuna sūjniisac chjächja caafi'nze'je'

9 Nava i'cue'sh yu' tyā'wē yuumée, Dyus nwe'wenijüyā'ja' jweeírráa wala ew yūuna fi'nzene'cue sūju'tj. 10 I'cue'sh tyā'wē ew yūuna yacjtjē'jwe'shtyi peeygājna pu'chna āate caavya'ja'jna āchpcach tyā'wē ew yūuna nes tyā'wē i'cue, naa pa'ga Dyusa' i'cue'sh ew yūuni's pechcanameena. 11 Nava andya' nmej entepcach tyā'wē caavya'ja'jna pa'pchuna nestju yūu jytjāasu' teehsa na'wērraj. Tyā'wē yūurra!, cyulmée pa'pchusa yuune'cue. 12 Wa'lwa'j yu'sa' le'chcue yujva ji'pjunuwe, yatsgaywe'shva ma'wēta Dyusa' cytey yuuna sūjna ūusuj jyuca yajcyrra Dyus peesni's jypa'ga tyā'wēy myūuwe.

13 Miiyajcywe, Dyusa' Abrahana's pu'chwa'ja's puuty we'werra' peecy yase'sírráa cysusna jurāyco, vite tyāate jytjaacuesa yu' meec yu' naa pa'ga. 14 Sa' na'jic: Isa, iindy jil'jty wala nuypejnana indya's pu'chwa'jsatj jīnac jurāy. 15 Atsa' Abrahana' wa'lmée ūytjasrra!, jypa'gac Dyus ma'wēne' yūuya' neeyūu tyā'sa' jyuca. 16 Atsa' nasava juraĩtsrra!, tyāawe'shte jytjaacue walasa's cysusnaty juraĩ', cytey yu'nja jīna. Tyā'wē yūute!, íshimée cytey yuuna sūjwa'jrráac ya'ji'pju!. 17 Tyāa pa'gac Dyusva tyā'wēy jurāy: Andy puuty we'weni's cytey yu'nja jīna. Dyusa' tyajy puuty we'weni's le'chcuerráa yujva yu'ptjejmée cytey yuuya'c ūsu!, atsa' tyā'sna jypa'gawa'jsa' cytey yuuyujuna sūjnarráa ūscajncu tyā'wē yūu. 18 Dyus jurāyni' e'nz jwendtyi yu': Cytey yu'nja jīna we'weni vite' tyajy yase's cysusni. Tyāa pa'ga tyajy puuty we'weni' yu'ptjejmeetyna. Cyajtja'w Dyusa' tyajy puuty we'weni's cytey yuuyujuna Dyusna pacuesaatyi's sūjna chjächja yaacywa'ja's ji'pju!. 19 Dyusa' tyajy puuty we'weni's cytey yuuna sūjnīsac cue'shtyi's jypumbamée chjächja caafi'nze'je', tyāa

pa'gatey cue'sha' cielute ũssa Dyus puuty we'weni cytey yuuwa'ja's
jiirratja'w ũytjasu' naa pa'ga. ²⁰Jesusa' cielute Dyus ũsnitec u'ca, Dyus
tashte pcalsawe'sh ju'ngu we'we pu'chrra cue'shtyi cytee ca'ga'jya'. Tyā'
Melquisedec na'wēsac yu'.

Jesusa' Melquisedec na'wēsa'

7 ¹Naa Melquisedecja' Salem chjambte jycaajsac yu', nava tyāāírráa
pcalsawe'sh ju'ngu we'we pu'chsac yu'. Atsa' teech ente' Abrahana'
guerrate puina ũsrra', naa quiwete jycaajsa ewmeesaty cnayrra
shawendna pa'jatste', Melquisedecja' pu'tjengya' casejrra bendicion acjte',
²Abrahana' diesmo ducjcu macuene' ducjwa'j ji'pju' tyāa yu's jyuca.
(Hebreo yuwete' Melquisedec jīnisa' Ew Jycaajsa jīnisa', atsa' Salem
jīnisa' wēt fi'nzeni jīniscac yu'. Tyāasa Melquisedecja' wēt fi'nzenite ew
jycaajsa' jīnisa'.) ³Sa' tyajy ney tyajy nji'j tyajy yatsgawe'sh tyāatyis
ya'jiyu'tsme', tyajy upyjni en tyajy uuni tyā'wēsarra yujtyva. Tyāasa
Dyus Nchi'c pcalsawe'sh ju'ngu we'we pu'chna nes yuusa na'wēsac yu'
Melquisedecja'.

⁴Āchja' ew mjiyuwe: Melquisedecja' iiméj wala jytujtjesa yu'c. Tyajíic
cue'sh yatsgawe'sh Abraham yujva diesmo's tyā'sna ducj guerrate puirra
tyajy jūityi's qui' cusa'jni's. ⁵Moises leya' naasáa Levi ji'l'j yuurráatycu jycaaja'
tyāawe'sh nwe'sh diesmoty jypa'gawa'jsa. ⁶Tyā'wēteva, Melquisedecja' Levi
ji'l'jmeerrava Abraham ducjni diesmo's jypa'gac, sa' Abrahana' macue Dyus
tyjityjniscateva Melquisedecja' bendeciycu. ⁷Bendeciysa' bendeciyniscate
jytjaacue walasa' tyā'sa' tyā'wēme' jīya' ājameetya quim yujva. ⁸Āchj
naa ensu cue'sh pwe'sh ducjni diesmo's jypa'gasa' nasa uuwa'jsarráata'.
Nava Dyus librute Melquisedecja's we'werra': Bagachte yujva uumée ityi
ũssa jīna we'wets na'wēc pta'shi': ⁹Levi ji'l'jwe'sh jyucaysa na'wē diesmo's
jypa'ga'ty tyāawe'shva diesmo's ducjsaty yuu Melquisedecna. Ew jiyute yu',
tyāawe'sh jyucaysa pa'gate Abrahancu ducj. ¹⁰Tyā'wēc yuu jīcainí Abrahana'
Melquisedec yacj puuty uyrra diesmo's ducjetste', Levi ji'l'j yuuwa'jsa' Abraham
cacueju casejmeityi yu'.

¹¹Ley nviitnisa Aaron ji'l' lewiwe'shrráa tyā'wē nasa pcalsaty Dyus
tashte cuutya'jya' ājavatsa', vite caajwa'j peejymeene' yu', Melquisedecva
ma'wēga Aaron ji'tjewe'shmée yu' tyā'wēysa. ¹²Tyā'wē pcalsawe'sh ju'ngu
we'we pu'chsa lewiwe'shtyi cutyi'jrra', leynava pju'se'jwa'ja'. ¹³Na'wē
vite caajwa'ja's we'we'c tyā' cue'shtyi jype'jsa Jesucristo's we'werrac
tyā'jī'. Jesucristo' Israel nwe'shrrava, Aaron ji'tjewe'sh meec yu'. ¹⁴Judá
ji'tjewe'shcu yu' tyā'sa' ew jīitja'w. Atsa' Judá ji'tjewe'sha' quim yujva
pcalsawe'sh ju'ngu we'we pu'chwa'ja's ji'pjmeeta'. Tyajíic Moisesa' tyā'wē
yūuwa'ja's Judá ji'tjewe'shtyi' maa yujtyva cysumée.

¹⁵Aytec isa ew ya'jiyu' leya'sva pju'se'jwa'ja's. Tyā'wē pju'se'cjaní
pcalsawe'sh ju'ngu we'we pu'chwa'jsa' ley nviitnisamée, Melquisedec

na'wēsac yu'. ¹⁶Tyā' ley tyjityjrra nviitnisamée, bagachterrāa yujva psumée ïtyi fi'nzewa'jsac yu'. ¹⁷Tyajíic Jesusa's we'werra na'jī Dyusa':

Indya' bagachteva pcalsawe'sh ju'ngu we'we pu'chna nes yuune'nga, Melquisedec na'wēsa jī'c.

¹⁸⁻¹⁹Tyajíic Moises leya' nasa pcalsaty Dyus tashte cuutya'jya' ājamée ma'wērrāa yujva, tyāa pa'gac tyāa leya's pju'se'jni yuu. Atsa' āchja' tyāa leyte jytjaacue ewsa ji'ptja'w tyāa yacja' Dyus tashte utyaaya' āja'tja'w.

²⁰Dyus tashte cuutya'jya' ājawa'ja's Dyusa' nviitutsrra' jurāimée yu' nvijtme'. ²¹Dyus tashte cuutya'jya' ājawa'jsa jīnisa nyafiive'shtyi' Dyusa' jurāimeec nvijt. Nava Jesusa's tyā'wē yuuwa'jsa nviitutsrra', jurāyrrac nvijt. Tyajíic Dyus librute na'jīna we'we':

Indya' bagachteva pcalsawe'sh ju'ngu we'we pu'chna nes yuune'nga jīnac Dyusa' tyajy we'weni's jurāy na' yu'ptjjeena.

²²Tyāa pa'ga Jesusa' jytjaacue ew puuty we'werra nviitnisa'.

²³Pcalsawe'sh ju'ngu we'we pu'chsa nyafiive'sha' wala kuj yu'ty, tyāa pa'gatey uunaty u'jue'. Tyāasaty teechrrāa yu' u'pya' āja'tsmée. ²⁴Nava Jesusa' uuwa'jsame', tyāasa pcalsawe'sh ju'ngu we'we pu'chna ūswa'ja's vitety nvijtmeena. ²⁵Sa' tyā'sna pi'cyrra Dyus tashte utyaawa'ja's pacuesāa yuutyi's nwe'werra, bagachte yujva vituwa'jmeete nvijt-ya' ājana, tyāa pa'gatey tyā' bagachte yujva uumée ïtyi nes yuuwa'jsa', pcalsawe'sh ju'ngu we'we pu'chna.

²⁶Pcalsawe'sh ju'ngu Dyus tashte we'we pu'chsa' Jesus na'wēsa ewsatja'w peejy yu'. Tyā' quīj pcal yujva ji'pjmeesa, bagachte yujva ewmée yūuna fi'nzesamée, naa quiwetewe'sh na'wēsa meec yu'. Tyāasac Dyus pucate cājpcach jyūna u'jnisa yuu. ²⁷Pcalsawe'sh ju'ngu we'we pu'chwa'jsa nyafiive'sha' na'wēty een isa tajcy icjrra Dyus altalte cambu' tyā'wē yūuwa'jsa meec yu'. Tyāawe'sha' nyafyte' peecy pcalpa'ga cju'e'y tyā'wē tajcy cambrraty nasaa pcalpa'gava tyā'wēy yū'. Nava Jesusa' een isa tyā'wē tajcy icjme', tyāa yuuc uu tee dyi'jrrāa jyucaysa pa'gate.

²⁸Pcalsawe'sh ju'ngu we'we pu'chwa'jsaty Moises ley nviitutsrra', naa quiwete nasa ājmeecuesarráatycu nviitu'. Nava ley scjēwnite Dyus jurāyrra tyā'wē yūuwa'jsa nviitutsrra', tyajy Nchi'c iiméj tjaacue ewsa'scu nvijt bagachteva nes yuuwa'jsa.

Dyus u'se puuty we'weni's cytey yuucajn pu'chsa' Jesusa'

8 ¹Na'wē pcalsawe'sh ju'ngu Dyus tashte we'we pu'chsa jī'tja'w tyā' maateva jytjaacue ewsa cielute Dyus pucate cachrra ²pcalsawe'sh ju'ngu we'we pu'chna ūsa' Dyus ūsnite yuu u'carra. Tyāa Dyus ūsni' nasaa tyaaajnisame', tyā'sa' Dyus yuuc tyaj. ³Pcalsawe'sh ju'ngu we'we pu'chna ūssa nyafiive'sha' pcalpa'ga tajcy icjrra Dyus altalte cambna nes yuuwa'jsa jīrra nviitnisaty yu'. Tyāa pa'gac Jesucristova quījrrāava nuycūuwa'j ji'pju. ⁴Jesucristo' naa quiwete tyā'wē pcalsawe'sh ju'ngu

we'we pu'chna ūswa'ja's vit wēevatsa', ājawa'jmeene' yu', tyā'wē ājacajmeníi Moises ley nviitnisaty ūs yu' pcalsawe'sh ju'ngu we'we pu'chsa. ⁵Nava naa quiwete tyā'wē pcalsawe'sh ju'ngu we'we pu'chsa' naasáa cielute ma'wērraj yūuwa'jna tyā'sna caajiyu'jnirrá'styi selpi'. Tyā'wē cielutewe'sha's caajiyu'jnisate írráac Dyusna neewe'wena ūswa'j yat Moises tyajatste', Dyusa' na'jīna we'we: Ew mtjeng, sa' tjā'j vitste andy ma'wē caavya'ja'tje', tyā'wēy yūune'nga jīc. ⁶Nava Dyus tashte cue'sh ju'ngu we'we pu'chsa Jesucristo selpiini' tjaacue ewa', tyāa pa'gatey Dyus tjaacue ew pu'chwa'ja's iiméj ew puuty we'wec tyā'sna selpiina ūsa'.

⁷Nyafíi puuty we'weni' ew casejvatsa', e'su qui' puuty we'wewa'j peejymeene' yu'. ⁸Nava tyā'wē ew casejpa'gamée, nasa' ewmée fi'nzepa'ga, Dyusa' na'jīc:

Israel vite' Judá yacj andya' qui' u'se puuty we'wewa'j en pa'jana,

⁹Egipto quiwejú peeygājna cutyi'jrra i'cue'sh yatsgawe'sh yacj puuty we'wetj tyā'wēmée yuuna.

Tyāa ente' andy puuty we'weni's cytey yuumeeta',

Tyāa pa'gatj tjengmée nvijt.

¹⁰Nava tyāa e'su' Israelwe'sh yacj na'wē puuty we'we'nja jī'c Dyusa':

Andy jycaajnyiti's tyāawe'shtyi caajiyu'jrra, ūuste fi'jrra nviitu'nja.

Sa' andya' tyāawe'sh Dyus yu'nja,

Atsa' tyāawe'sha' andy jīi yuutyna.

¹¹Dyusa's jiyucajn teechna na'wērraj caapiya'jwa'j jī'pjumeetyna,

tyāawe'sh nwe'sh vite' tyāawe'sh nyacjrráa yujtyva,

Tyāa pa'gatey le'chcuesa ma'ty yuu meerra' tjē'jsa ma'ty yuu nava tjēymée jiyuya' ājatyna andya's.

¹²Sa' tyāawe'sh pcaltyi peltunāyrra, peena yu' bagachterrāa yujva

yajcyme'nja tyāawe'sh pcaltyi's jī'c.

¹³Dyusa' qui' vite u'se puuty we'wewa'j jī'ptju jīrra', yatsíiwe'sha' selpiime' jīrrane' tyā'jī'. Atsa' selpimée yuuna pa'jsa' scjēwwa'jsana.

Dyus ūsni naa quiwetewe'sh vite' cielutewe'sh

9 ¹Dyus puuty we'wenisa nyafiiwe'sha' jycaajni jī'pjuc Dyusna neewe'wena cytey nwēese'cjan dyuus yat naa quiwetewe'shrráarrava. ²⁻⁴Tyāa yata' e'nz jwendcu tyundeni yu': nyafyte u'cana cūunisate Dyusna neewe'wena ūsni jīnisatety bela tyaaajnisate vite' pan āshni mesa vyuu bee altal incienso cambnisa tyā'wēsa ūsu'. Atsa' e'ste tyundenisate' quim yujva u'canimeesa naasáa Dyus yuurráa ūsni jīnisac yu'. Cyteea' caja vyuu bejrrarrá's jyuca scandnisac ūsu'. Tyāa caja dyiite yu' teech vyuu bee jarru maná jī'pjsa, vite' Aaron cjaambu ye'chcu tyāa, vite' Dyus jycaajni cuet taplate fi'jni yuuc tyāaty jyaawni ūsu' caja dyiite. ⁵Tyāa vyuu bee caja cajcuete yu' Dyus angel na'wēysaty piisarra tyaaajni ūsu', Dyusa' ayte nescu yu' jīna caajiyu'jsata'. Sa' tyāawe'sh fyuu

cu'taju jyucaty apjna ūsu', na'wē pcalpa'ga tajcy icjrra tyāa eea's jyūna cūjrra tyaja'ty tyā'sna. Nava tyā'wēsaty ew āate pta'shwa'lj en jil'pmeetj āchjii yu'.

⁶Sa' tyāa yatte tyā'wē pjeu'jni nyafyte u'cana cūunite yu' pcalsa ju'ngu we'we pu'chsawe'sha' u'cana nestyi yu', ma'wē yūuwa'ja'sva cytey yuuna. ⁷Nava vite ajte e'ste yu' tyāawe'sh npiitstjēj teechrrāac u'ca', ānute tee dyi'jrrāa. Sa' cytee u'catsrra', perdon pējyya' tacy eea's jyūrrac u'ca', peecy pcalpa'ga vite' nasaa pcalpa'ga jii yā'jrra. ⁸Tyā'wē nyafyte u'canisa Dyusna neewe'wena ūsni jīnisa' selpiina nescu yu' Dyusa's neewe'wewa'lj. Nava vite ajte Dyus yuurraa ūsni jīnite u'cawa'lj dyi'lj yu' pjatemeycu yu' tyā'wēc Dyus Espiritu' caajiyu'ju'. ⁹Quījva jyuca tyā'wē yūunisa' āchj naa ensuwe'sha's caajiyu'jsarrāac yu'. Cytee tajcy icjrra Dyusna wechana cambnisa' tyāawe'sh pcaltiyi cjucjya' ājawa'jsame'. ¹⁰Tyā'wē yūunisa' Dyus yu'ptjajpcachrrāaty selpiwa'jsa yu', tyāasaty cajcucjē āacjēwe'sha'srrāa jycaaja' ū'nisu, tundynisu, cacuete ate fi'nzewa'lj tyā'wēsaty.

¹¹Nava āchja' pcalsa ju'ngu we'we pu'chsa tjaacue ewsa ūytjasnisa pa'cj tyā' Cristo'. Sa' tyajy yujuni' nasaa vitnisa naa quiwetewe'shmée, cielute iiměj ewsate u'carra cytee pcalsa ju'ngu we'we pu'chna selpiina ūsa'.

¹²Sa' Cristo' Dyus yuurraa ūsnite quīj pcal yujva meetec u'ca. Nava tyā' capla ee vite' claa luuch ee tyā'wēsaty jyūrra Dyus tashte u'came'. Tyajy ee yuunac pcawrra u'ca tee dyi'lj yuurraa. Nava jyucaysa bagachterrāa yujva vitumée ewte neeyūuwa'ja's vit-ya'c tyā'wē yūu. ¹³Na'wē claa ee capla ee vite' claa luucha's altalte cambnisa cjuuts tyā'wēsaty nasaa cacuecjē pē'tsjutste', āacjē canzh pēetjeni's yaatesaa dyijte', ¹⁴Cristo ee yu' wejy tjaacue yaateya' ājawa'jsana. Tyā'wē yaateya' ājacajní, Dyus Espiritu ptsuwa'ljmeesa pu'chte Cristo' peequí ya'ducjrra quīj pcal yujva jil'pmeec tyajy eea's pcaw pcalsa pa'gate. Tyāasa tyajy eea' cue'sh ewmée ūus yaacyni dyiitewe'sha's cjucjwa'jsa', Dyus ityisa's selpiiya' ājacajñ.

¹⁵Dyusa' cue'shtyi nwe'wewa'ja's u'se puuty we'wec tyā'sna Jesucristo' cytey yuuna ūsa', na'wē nyafyte Dyus puuty we'wec tyā'sna nwēese'ljmeerra pcalte wetetja'w tyāa pcalva peltunāynic yuu Cristo uupa'ga. Tyaj Jesucristo nwe'wenisawe'sha' jypa'gaya' ājatyna Dyus jii bagachterrāa yujva ptsuwa'jsamée cue'sh jiirrarrāa yuuwa'ja's nvijtcu tyā'sna. ¹⁶Nava na'wēsa's miiyajcywe: Andy uute', andy jil'pjni's indy uweene'nga jīna puuty we'werra etste fi'jrra nviitnisa', selpiiujuna. ¹⁷Nava tyā'ljīna nviit-sa uuterrāa tyāa etsa' selpiina. Tyā'ljīna nviit-sa uumeyte yu', tyāa etsa' selpi'tsme'. ¹⁸Tyajjiic Dyusa' nyafii puuty we'wena fi'jrra nviitnisa'sva ee pcawrra nvijt selpiina neeyūucajñ. ¹⁹Tyā'sa' na'wēc yūu Moisesa': Nasa jyucaysaty pta'shcu ley jycaajni ma'wēteva jyuca. Tyā'wē yūurrac cjas bej vite' ējya cu'ta yacj claa luuch ee vite' capla eete yu' ca'ndnisate acjrra Dyus puuty we'wena fi'jrra nviitni ets cajcuesu pē'tsjuts. Sa' nasatyva jyucaysaty tyā'wēyecu yūu na'ljīna: ²⁰Dyusa' na'wē i'cue'shtyi jycaajna puuty we'wena

fil'jrra nvijtcu tyāa etsa' āchja' i'cue'shtyi jycaajna selpiiya' ājana, ee pcawni yuupa'ga jīc. ²¹ Sa' Dyusna neewe'wena ūsni yat vite' cytee quijrraj ne'ta ūsu' tyāatyva tyā'wēycu ee yacj pē'tsjuts Moisesa'. ²² Ley we'werra': Quijnava jyuca ee yacj yuurráa yaatewa'l' yuuna, atsa' ee pcawmeete yu', pcala' peltunāynimée yuutyua jīnac jycaaja'.

Cristo uuni' pcaltyi jyuca cjucju

²³ Tyā'wē cielute ma'wēna tyā'sna caajiyu'jsa naa quiwetewe'shrráa yujtyva yaatena ūswa'l' peejtyti yu', tajcy icjrra tyāa ee yacj. Atsa' cielute ūswa'jsaty yaatewa'l' yu' wejycu tjaacue ewsa peejy yu', tajcy icje'ty tyā'wēsamée. ²⁴ Cristo' naa quiwete nasaa tyaajnisaterráa u'came'. Tyā' cielute yuuc u'ca, sa' āchja' cytee Dyus tashte cue'sh ju'ngu we'we pu'chna ūsa', atsa' Dyusna neewe'wena ūsni yat naa quiwetewe'sha' cielute ma'wēna tyā'sna tyā'wēy piisanisarráac yu'. ²⁵ Pcalsawe'sh ju'ngu we'we pu'chsa npiitstjē'jsa' aañu isa tee dyi'jrráac u'ca', Dyus yuurráa ūsni jīnisate. Nava peecy eemée, tacy eerrá'scu jyūrra u'ca', cytee pē'tsjutsya'. Nava Cristo' uurra cujus Dyus tashte u'came'. ²⁶ Tyā'wē yūuvatsa', naa quiwe's vitiyua aañu isa uuna nesne' yuuwa'jsa yu'. Nava tyā'wē yūumée, Cristo' tee dyi'l' yuurráac cluuste uuya' vyaa jyucaysa pcaltyi cjucjya'. ²⁷ Tyāa pa'gac nasatyva tee dyi'jrráa jyucaysaty uuwa'jsa vitrra tyāa e'su' ma'wēsarrava Dyus tashte paswa'l' vitni yuu, ²⁸ tyā'wēy Cristova tee dyi'l' yuurráac cluuste uu maanzcuēesa pcaltyiva jyuca cjucjya'. Sa' tyāa e'su' qui' vyaana, nava pcaltyi cjucjya' qui' uuya'mée, naasáa tyā'sna ūytjassaty pe'l'na u'jya'rráa tyā'wē vyaana.

10 ¹ Moises leya' naasáa tjaacue ewsa vyaaya' ūsu'ty tyāaty caajiyu'jsarráaty yu' tyā' isa ewsa yā'l' yu'tsmeeta', tyāasa na'wē Dyus tashte utyaaya' aañu isa tajcy icjna nestyi yu' tyāawe'shtyi' pcal ji'pjmeesa vit-ya' bagachterráa yujva ājawa'jsa meec yu' leya'. ² Tyāa leya' nasaty pcal ji'pjmeesa vit-ya' ājasaavatsa', na'wē pcalpa'ga maanzcuēe usva tajcy icjna nestyi yu' tyā'wē yūuna nes yuuwa'l' peejymeene' yu'. Tyāa pa'gatey pcalpa'ga tee dyi'l' tajcy icjrra cambnijūyā'l' yu', pcalsatja'w sūjwa'l' peena yu' ūusutjemeena. ³ Nava tyā'wē yūupcachte, aañu isa pcalsatja'w sūjna nescu ya'yū', ⁴ tyāa tajcy icjnisa claa ee vite' capla ee tyā'wēsa' pcaltyi cjucju'tsmeeta' naa pa'ga.

⁵ Tyāa pa'gac Cristo naa quiwete pa'ljatsrra', nal'jīna we'we Dyusa's: Tajcy icjrra cambni's jypa'gameerra, andy cacue yacj uuwa'ja'sngu vit.

⁶ Pcaltyi cjucjya' tajcy icjrra cambnisaty wecha'tsmeeng.

⁷ Tyajtj nal'jī: Dyus, iindy jytjāasnirrá's cytey yuuya' yujtj,

Andy fi'nzewa'ja's ma'wē fil'jni ūsna tyā'sa' cytey yuuya' jīc.

⁸ Na'wē Cristo we'werra': Pcaltyi cjucjya' tajcy icjrra cambnisaty'i's wecha'tsmeeng, (tyā'wē yūuwa'ja's macue ley jycaajnisateva), ⁹ tyāa pa'ga:

Dyus, iindy jytjääsnirrá's cytey yuuya' yujtj jīc Cristo'. Isa ew jiyute yu', naa tajcy icjna ūsni's iviiturra, tyāa pa'gate vite uuwa'lsatj nviitu' jīrrane' tyā'jī'. ¹⁰Jesucristo' Dyus jytjääsni's cytey yuurra tyajy cacue's peequí ya'ducjrra cluuste uuc jyucaysa pa'gate tee dyl'jrráa. Tyāa pa'gac Dyusa' cue'shtyi's tyāa jīi vit.

¹¹Pcalsawe'sh ju'ngu we'we pu'chsa judiuwe'sha' tyā'wē yuj een isa maanzcuēe usva tajcy icjrra altalte cambna nestyi yu' jycaasewa'jmée, macue tyā'wē yūunisa' bagachte yujva pcaltyi' cjujwa'jsameeteva. ¹²Nava Jesucristo' pcalpa'ga tee dyl'j yuurráa cluuste uuni yacjrráa jyuca jyā'jnic yuu tyāarráa bagachteva selpiwa'jsa. Tyāasac cielute Dyus pucate cach. ¹³Sa' āchja' cytee ūsa', tyā'sna atsesa jyucaysa tyā'srrarráana nwēese'jwa'ja's Dyus vitna jyā'jpcach. ¹⁴Tyāa pa'gatey tee dyl'j cluuste uuníi yacjrráa jyuca jyā'jnic yuu tyajy nasa yuuwa'lsawe'sh jīi bagachteva selpiwa'jsa. ¹⁵Tyā'wē Cristo tee dyl'j cluuste uunirráa bagachteva selpiwa'jsatefírráac Dyus Espirituva na'jīna we'we:

¹⁶Tyāa en scjēwniijū' na'wē yūuya' puuty we'we'nja jī'c Dyusa':

Andy jycaajnytyi's tyāawe'sh ūuste cyu'acje'je'nja pechcanacajmén.

¹⁷Sa' tyā'wē yūunijū', tyāawe'sh ewmée yūuna fi'nzeni pcaltyi's bagachterráa yujva yajcyme'nja jī'c.

¹⁸Tyā'wē pcaltyi's jyuca peltunāynijūyā'ja', peena yu' pcalpa'ga tajcy icjrra cambna ūswa'j peejyme'.

Dyus tashte utyaawa'ja's jī'ptja'w

¹⁹Tyāa pa'ga, yacjtjē'jwe'sh, āchja' quīj pcal yujvamée Dyus yuurráa ūsnite u'cawa'ja's jī'ptja'w, tyā'wē Jesucristo' ee pcawrra ²⁰Dyus tashte u'cawa'j dyl'j u'sesa's pjaandec. Cytee Dyus ūsnite' quim yujva u'cacajmén tyundenic ūsu', nava tyāa yuuc cluuste uurra cytee tyundeni's pjaande cue'sh u'cacajñ. ²¹Tyāasa Jesusa' Dyus tashte we'we pu'chna ūsa' Dyus luuch jyucaysa ju'ngu. ²²Tyāa pa'ga Cristo' pu'chyuujuna sūjna ūusuj jyuca yajcyrra Dyus tashte ūucjmée utyaaga, tyāa pa'gatey Cristo' cue'sh ūuste pcaltyi' jyuca yaatec, atsa' cue'sh cacueva bautismote acjnic yuu, yuuwemeesatja'w sūjnarráa yaacycain. ²³Āchja' Dyus tashte utyaawa'ja's jīiyā'tja'w na' Dyus yacj tyutemée tyāa yacj yuurráa chjāchja fi'nzega. Tyāa pa'gatey Dyusa' cue'shtyi bagachte yujva psumée ityi fi'nzewa'ja's ūsya' puuty we'wec tyā'sa' cytey yuuna. ²⁴Sa' ew yūuna peeygājna fi'nzewa'ja's jī'pjuya' puuty ya'pu'chjiga cyteerraj. ²⁵Vite na'wēty cue'sh pcjaacetste pa'ja'tsmée tyā'wē yūumée, wejyva teechna na'wērraj cyteerraj puuty cchjāachja'jna fi'nzega, na'wē Cristo quīiwal'j enva utyaatsyā'ja' naa pa'ga.

²⁶Tyā'wē ewsa's āate pta'shni wala ew jīirra tyā'sa' ajtsena tyute'nja'w, atsa' tyā'wē yūusa's peena yu' peltunāywa'jmée yuuna. ²⁷Naasáa iiméj seena' ūucjūcsarráac ūytjasu', Dyus castigo ipy seena'sa jyuca

iviituwa'jsa Dyusna atsesawe'shtyi. ²⁸Ma'wēga Moises leyrráa yujva tyā'sna nwēese'jsameetyi' e'nz meerrava tecj nasa tyā'wē yūuni's jiisaty pējyrra isa dyijte!, peeygāawa'jmée icjwa'jrrá's vitu!. ²⁹Atsa' Dyus Nchi'ca's ajtserra weechina, sa' tyajy eea's pcawrra uuni'sva quijte yujva seelpimeesa na'wē weechina, sa' tyā'wēy Dyus Espiritu peeygāasa'sva atsesa!, wejy seena' castigāyini yu'nja'w sūjwa'ja's mji'pjuwe, tyā'wē Jesucristo eea' Dyus puuty we'weni's cytey yu'uwa'ja's vitwa'jsa' tyāa eefírráa i'cue'sh pcaltyiva peltunāysa' na's tyā'wē atsepa'ga. ³⁰Dyusa' na'jīnac we'we tyā'sa' mpa'yajcywe: Andyrráa castigāywa'jsatj, tyā'sa' andy jiine'tca jī'c. Sa' qui' we'werra': Andy jype'jni nasatyi's castigai'nja jī'c. ³¹Tyāa pa'ga seena' yuj ūucjūucja', Dyus ityisa cusetete castigāywa'j wetena pa'tje!.

³²Nava tyā'wē yūuya'mée i'cue'sha' nyafiitey fi'nzeni's miyajcywe: nyafyrraj Dyus yuwe's jypa'gatsrra', wala pytjaa yuui'cue tyacue wala tjēysa pa'tjeva. ³³Sa' i'cue'sh maafía' wēeshuna nasaa cshavyte pāpani i'cue yuu, atsa' viteva tyā'wēy ūussawe'sh yacj ja'ndarraaj ūussa i'cue yuu. ³⁴I'cue'sha' carcelte ūssawe'sh pa'gate peeygāawa'ja's jī'pjui'cue, sa' i'cue'sh jī'pjunity cusa'jatste!, ūusachamée wechanai'cue neeyūu. Cielute bagachterrāa yujva ptsuwa'jsamée tjaacue ewsa's jiirrai'cue tyā'wē yūu. ³⁵Tyā'wēsa's jiiyā'jrra!, pechcananuwe, tyāa pa'gatey tyā'wērrāa yajcy na'finezpa'ga tyā'wē seena' wala ewsa's jypa'gawa'jsai'cue. ³⁶Dyus jytjāasni's cytey yuuya' ūuswa'ja's wa'lmée jypa'gawa'j jī'pji'cue. Tyā'wē yūurra!, Dyus peesni seena' wala ewsa's jypa'gane'cue. ³⁷Tyā'wēme!, Dyus libroute na'wēc we'we!:

Wejy jytjēyuumée dund yuj quījiana

Tyāa quīiwa'jsa' tyachjimeena.

³⁸Atsa' Dyusrrāana yajcy na'finezsa' ewte neeyūuna.

Nava tyā'wē yūumée tyuteete!, tyāa yacja' wēt fi'nzeme'nja jī'c.

³⁹Nava na'wē tyuteerra vituwa'tje ūsta' tyāatewe'shmeetja'w cue'sha!, wejyva cue'sh ūus vitucajmén Dyusa'srrāa yajcy na'finezatewe'shtja'w.

Dyusa's ūuste yaacynisa

11 ¹Dyusa's ūuste yaacysa' yafyju āate yu' uymeerrava, ūuste yu' jiiic ya'fi'nze' cytey yuuyujuna sūjna ūytjasna. ²Cue'sh yatsgawe'sha' tyā'wē yaacywa'ja's jī'pjuty, tyāasaty Dyus dyi'pte ew fi'nzesa yuu.

³Sa' cue'shva tyā'wēy yaacywa'ja's jī'ptja'w, tyāasatja'w āchj na'wē quiwe ūsa' tyā'sa' Dyusa' tyajy we'weni yacjrrāa vitne' nyafii yu' quijva meeteva sūju!.

⁴Abela' tajcy icjrra cambte!, Dyusa' wechayujuna sūjna ūuste jiirrac tyā'wē yūu, Cain jiiite tjaacue ewsa. Atsa' tyā'wē yūunisa' Dyus yacja' ewsane' yu' naa pa'ga Dyusa' jypa'gac. Atsa' Abel yu' uuni!, nava Abela' tyā'wēc Dyusa's ūuste jypumbamée yajcy jīni yu' āchpa'jva ūsa!.

⁵Enocva tyã'wê Dyusa's ũuste ew jirra Dyus yacjrráa fi'nzepa'ga, uumey pe'ljna u'jnic yuu cielun. Tyãa pa'ga peena yu' uymeeta', tyã'sa' Dyuscu pe'ljna u'j tyãa pa'ga. Atsa' Dyus librute Enocja's we'werra': Nyaffi uumey Dyus yacj wechanac fi'nze' j'i'c. ⁶Nava ũuste Dyusa's yuurráa yaacywa'ja's ji'pjmeete', Dyus yacj wechana fi'nzeyá' ya'ája'tsme', tyãa pa'ga tyajy tashte utyaasa' Dyusa' ũsna sa' tyã'sna pacuete', nwe'wena sũjwa'ja's ũuste ji'pjuwa'ja'.

⁷Noeva tyã'wêy Dyus we'weni' cytey yuuyujuna sũjwa'ja's ũuste jiic yu'. Tyãasac castigo nus pa'jyujuna sũjrra Dyus jycaajni's nwêese'jrra barco's vit, tyajy yattewe'shtyi jyuca nwe'weya'. Sa' Dyusa' cytey yuuyujuna sũjwa'ja's ũuste ji'pjupa'ga, Dyusa' cytey yuute', naa quiwetewe'sha' ya'castigãtyi atsa' Dyusa' Noea's ewsa' jĩnac we'we.

⁸Abrahamva tyã'wêy Dyusa' cytey yuuyujuna sũjwa'ja's ũuste jiirrac, Dyus quiwe ũsya' pa'yate', nwêese'jrra casejna u'j, nava mtee pa'lwa'ja'srráa yujva jiimeec yu'. ⁹Tyã'wê Abrahana' Dyus quiwe ũsya' neeyũune' tyã'sa' bagachterrãava cytey yuuyujuna sũjwa'ja's ũuste jiirrac maa sũjmée tyagachjĩ yu' pa'jsa na'werráa tultu tyajrra fi'nzena ũsu'. Atsa' Isaac, Jacob tyãawe'shva tyãa quiwe's jypa'gawa'jsarrava, tyã'wêyrráaty pa'jsa na'wê fi'nzena ũsu'. ¹⁰Tyãa pa'gatey Abrahana' cielute Dyus vitni chjamba's jypa'gawa'ja'scu ũytjasna ũsu', tyãasac maa sũjmée fi'nze'.

¹¹Abrahana' tyã'wê Dyus we'weni' cytey yuuyujuna sũjwa'ja's ji'pjupa'gac Sara' tyacue wala tjê'cjue luuch ji'pjuwa'jsamée yã'jrrava, luuch ji'pju. ¹²Tyãasac Abrahana' tyajy jil'j iiméj wala kuj ji'pjsa yuu, cielute estrella vite' yu'pucasu cuetmusety ma'wêga isate ya'ája'tsmée tyã'wêc kuj ji'pju, tyacue iiméj wala tjê'cjue yã'jrrava.

¹³Na'wê Dyusna yaacysa nacue wala kuj cysustja'w tyãawe'sha' Dyus ũsya' neeyũuc tyã'sa' jypa'gamey uuty, tyãasaty e'su tyachterrãava Dyusa' cytey yuuyujuna sũjna wechana yaaqui'. Sa' tyãawe'sha' naa quiwete tundtewe'shrráa ne'tca'w jĩnaty we'we. ¹⁴Tyãawe'sha' tyã'wê we'werra' ew jiyute yu', vite ajte ũsya' u'jwa'ja's pacuesáa ne'ta yu'. ¹⁵Tyãawe'sha' maa quiweju yuusaarrava tyã'sna yajcyna ũsvatsa', tyãa quiwení shawendwa'j ne'ta yu'. ¹⁶Nava tyãawe'sh ũswal'j tjaacue ewsa's ne'ta pacuesáa yu' cielutewe'shna, tyãasaty shawendmée. Tyã'wê shawendmeeta' tyãa pa'gac Dyusa' tjaame'tsmée tyãawe'sh Dyustju jĩna ya'cysuswa'ja's, tyãasa tyãawe'sh ũswal'j pjeu'jni ji'pja'.

¹⁷Abrahana' tyajy nchi'c Isaacja's icjteva Dyusa' qui' ũtyi vituna sũjwa'ja's ũuste jiirrac icjya' jyũna u'j. Dyusa' Abraham qui'j yũuteva jiyuya' sũjrra tyajy nchi'c teechrrãasa's icj caatjeva, wa'lmée cytey yuuya'vac yu'. Macue Dyus tyãa yacj puuty we'werra': ¹⁸Lindy jil'j Isaactewe'sh tyã'wê wala penatyna jĩna we'weteva, icjya'vac yu'. ¹⁹Nava Abrahana' tyajy ũuste yu' uuteva Dyusa' qui' ũtyi vituna sũjwa'ja's ji'pju'c.

Tyāasa isa ew yajcyte yu', Abraham nchi'ca' uusaawe'sh cshavyu qui' ityi yuusāa na'wēsa'.

²⁰ Isaacva Dyusa' cytey yuuna sūjwa'ja's ūuste ew jiirrac tyajy nchi'c Jacob Esau tyāawe'shtyi' bendicion wala jypa'gane'cue jīna we'we.

²¹ Jacobva Dyusa' cytey yuuna sūjwa'ja's ūuste ew jiirrac uutsyā'jrra', José nchi'ctyi' teechea na'wērraj jyucaysaty wala bendecīni yuune'cue jīna we'we, sa' Dyusa's neewe'wec quīitsjurra.

²² Joseva Dyus pu'chte' Israelwe'sha' Egipto quiwejū casejetyna sūjwa'ja's ūuste ew jiirrac, uuya'vayā'jrra tyāawe'shtyi' neewe'we tyajy cacue's mtee jyūna u'jrra pendaawa'ja'sva.

²³ Moises neywe'shva Dyusa' nwe'wena sūjwa'ja's ūuste ew jiirraty tecj a'te uta Moisesa's sūtj, luucha' wala zhichcue yu'ne' tyāa pa'ga. Macue Egipto quiwete jycaajsa yu' icj caatjeva icjmeeta'.

²⁴ Moisesva Dyusa' pu'chjina sūjwa'ja's ūuste ew jiirrac, Egipto quiwete jycaajsa niisa nchi'c jīna cysusni yuuwa'j yu'sa' wa'l, walaana cājrra'.

²⁵ Sa' naa quiwete pcalte wechana fi'nzepcachte, wejyva ūucjmée Dyus tyjityjnisa yacj ja'ndarraj pcyuuni yuuwa'ja'srrāac yajcy. ²⁶ Tyāa pa'gatey cielutewe'sha's jypa'gawa'ja'srrāac yajcyrra fi'nzena ūsu'. Tyāasac Egipto quiwete iiméj seena' wala ji'pjuni's yaaquipcachte, Cristo na'wēy yaatseni pcyuuni fi'nzeni's ji'pjuya'rrāa yajcy. ²⁷ Dyus pu'chwa'ja's ūuste ew jiirrac Moisesa' jycaajsa ūuschani yu'sa' ūucjmée Egipto quiwejū casejna u'j, sa' Dyus tashu le'chcuerrāa yujva tyuteméc fi'nze, Dyusa' vyaasameeteva yafyju uyna ūs na'wē yajcyna.

²⁸ Dyusa' nwe'weyujuna sūjwa'ja's ew ūuste jiirrac Moisesa' Pascua fiesta's vitrra eea's vitycjē shūsh caaj, icjwa'jsa angel sējrrava Israelwe'sh luuch ntjē'jsa maa yujtyva icjcajmen.

²⁹ Israelwe'shva Dyusa' pu'chjina sūjwa'ja's ūuste ew jii yuupa'garrāac, mar bejuy uycjēwwa'j dyi'j pjaate tyāawe'sh uycjēwcajn. Atsa' Egiptowe'shva tyā'wēy uycjēu'nja'w sūjrrava tyāawe'sha' icjtee uuty yu' afijmbe.

³⁰ Dyusa' pu'chjina sūjwa'ja's ūuste ew jiirraty Israelwe'sha' Dyus we'weni's nwēese'jrra tyā'wē siete enpcach Jerico chjambte muralla peecu'j tandyina ūsu', atsa' tyā'wē nwēese'pja'gac muralla' wete.

³¹ Rahabva Dyusa' nwe'weyujuna sūjwa'ja's ūuste ew jiirra, Israelwe'sh e'nzsa cytee peetjengu'jya' pal'saty ewcu jypa'ga. Tyāa pa'gac uumée, Dyusa's nwēese'jsameewe'sh vite yu' uuteva.

³² ¿Quīj jwee yu' pta'shitca? En ji'pjavats yu' pta'shwa'j yu' walafīrrāa ūsa', Gedeon, Barac, Sansón, Jefté, David, Samuel, Dyus yuwe pta'shsawe'sh tyāawe'shtyi' we'wewa'j. ³³ Tyāawe'sha' Dyusa' pu'chjina sūjwa'ja's ūuste ew jiirraty maaíi yu' guerrate puiirra cnay, vite' ewtyi jycaajna fi'nze, vite' Dyus pu'chni's jypa'gaty, vite' león yuwetyva apjtyi, ³⁴ vite' seena' ipy walajuva chjavymeeta', vite' icjsa cusejuva

iyuty, vite' puiiya' chjächjameecueteva cchjächja'jnisa yuurra, guerrate iiméj cajsatyva cnaytyi. ³⁵Naapcachja' u'ywe'shva tyāawe'sh luuch uunisaty qui' ityi vitni jypa'gaty. Vite' seena' wala pcyuuni yuurra uuty, qui' ityi yuuwa'ja's ji'pjurra tjaacue ewte fi'nzeyā' sūjrra, nwe'wewa'j yu'sa' jytjāasmeeta'. ³⁶Naapcachja' vite' weechna pechujcuerra tsam cadenaju tundrra carcelte tyaajnity yuu. ³⁷Vite' cuet wāatatajrra icjnity yuu. Maafí yu' pyājsu pētsnity yuu. Vite' iiméj seena' wala cyūusu'jni yuuty. Vite' cchilluj icjnity yuu, naapcachja' vite' ajtserra neeuni yat ji'pjmeety pecūjnarrāa ūsu', qui'jva ji'pjmeerra piishāa cja'ty capla cja'ty tyā'wēsarrā's pā'chrā, ñuste pcyuunity fi'nzena ūsu'. ³⁸Tyā'wē pcyuunisawe'sha' nasa u'pnimée quiwesurrāaty fi'nzena ūsu' yu'cjsu, quiwe cafysu. (Nasa tyā'wē Dyus yacj zhichcue fi'nzesa yacja' naa quiwe' ūswechte yuuva meena.) ³⁹Dyusa' pu'chjina sūjwa'ja's ūuste ew jiirra tyāawe'sh jyucaysa tyā'wē seena' yūuni yuurrava, Dyus ūsya' neeyūuc tyāa yu'sa' tyagachjī yu' jypa'gameeta', ⁴⁰tyāa pa'gatey Dyusa' tjaacue ewsane' ji'pju' āchj naa ensu cue'sh jīi yā'jrra. Atsa' tyāawe'sha' cue'sh yacj ja'ndarra'j jypa'gawa'jsarraty tyagachjī yu' jypa'gamée.

Jesucristo yuurrá's yajcyna fi'nzega

12 ¹Dyusa' pu'chjina sūjwa'ja's ūuste yaacysawe'sh nacue wala cuj ūsta' atsa' cue'sha' tyāawe'sh cshavyte ūstja'w. Tyāa pa'ga pcal caypumba'jwa'jsa's nvijtna, qui'jva Dyus yacj fi'nzewa'ja's suwwa'jsa yu'sa' jyuca nvijtrra, macue tjēyteva Dyus yacj yuurráa fi'nzega, uu entepcach.

²Jesucristo yuurrá's pu'vitumée yajcyna fi'nzega, tyāa pa'gatey tyāa yuurráac Dyusa' pu'chjina sūjwa'ja's ūsu', sa' tyāa yuurráac Dyusna yaacyni jyuca cytey yuuna pa'pjcach pu'chji'. Tyā'wē yūuya'c Jesusa' tjaamewa'j yu'sa' yajcymée cluuste uu, tyacue wala ñusñusteva. Tyāa pa'gatey pytjaa yuuni en scjēwniijū' wēt wechana ūswa'ja's jiic yu', tyāasac cielute Dyus ūsni pucate cach.

³Jesusa' nacue wala pytjaa yuuc pcalsawe'sh cusete tyā'sna i'cue'sha' yajcyrra tyāa na'wēy ñuswa'j en pa'tjeva Dyus tashu tyutemée mfi'nzewe.

⁴I'cue'sha' pcal's nvijtrra Dyus yacj fi'nzepa'ga iiméj seena' ñusñus uuwa'j yu'sa' ji'pjumey i'cue. ⁵Sa' tyacue dund yu' pechcanawa'jmeena Dyusa' tyajy luuchtyi's na'wēc yu'cypeje' tyā'sna:

Dyus yu'cypejna castigāyni's atsenu, andy nchi'c,
Sa' juuna' we'wete', ñusna ūuschanu.

⁶Tyāa pa'gatey Dyusa' tyajy peeygāanisatyi's yu'cypeje'c ew fi'nzecajn,

Sa' tyajy luuch yuutyi's jyucaysatyuc castigaī' jī'c Dyus libroute'.

⁷I'cue'sha' castigāyni's mwantaīwe, tyāa pa'gatey Dyusa' i'cue'shtyi' tyajy luuch na'wēc jype'je'. Miiyajcywe: ¿Maa luuchrrá' ney yu'cypejna castigāynimeesa ūstyman? ⁸Dyusa' tyajy luuch yuutyi's jyucaysatyuc

yu'cypejna castigaĩ', nava i'cue'sha' yu'cypejna castigãynimeesa yuurra', tyajy luuchmée vitesate luuchrra tyã'wē yuune'cue. ⁹Cue'sh le'chcuēyte', naa quiwete cue'sh tata yu'cypejte', cytey nwēese'je'tja'w na' āchja' wejy tjaacue ew nwēese'jwa'j ji'ptja'w cue'sh Tata cielutewe'sha's. Tyã'wē nwēese'jrra', ptsumée ityi fi'nzewa'ja's ji'pju'nja'w. ¹⁰Naa quiwete cue'sh tatawe'sha' tyāawe'sh ūuste ma'wēne' wejy ew ūustutje' yu'cypejna jype'jwa'ja's tyã'wētyi yūuna jype'je', naa quiwete tyachmée fi'nzewa'ja'srráava. Nava Dyusa' cue'shtyi iiméj wala selpiwa'ja's caapiya'jnac yu'cypeje', tyāava ma'wē pcal ji'pjmeena tyã'wēy yuucajn. ¹¹Āchj castigãy ína yu' wala yuj acata', tyāa pa'gatja'w jypa'gaya' wa'lu'. Nava tyāa castigo's jypa'garra ew fi'nzeya' piyate', wala yuj ewsa', jypumbamée wechanac ya'fi'nze' naa pa'ga.

Dyus we'weni's weechya'mée mpa'yajcywe

¹²Tyāa pa'ga wa'lmée chjāchja miijajcywe, ewmeete fi'nzena ūsrrava tyājū mcaasejwe. ¹³Tyã'wē yūurra', dyi'j ewsaju peena yu' jypumbameene'cue.

¹⁴Jyucaysa yacj ew fi'nzewa'jrrá's pa'pchuna meswe, pcalte fi'nzemée. Tyã'wē pcalte fi'nzerra', quim yujva Dyusa's uyya' ājameena. ¹⁵Dyus peeygājrra nwe'wenijüyá'ja', wala mpa'yajcywe. Tyã'wē jypa'yajcyrra yuurráa i'cue'sh maa yujva tyã'wē vitesaty caypumba'jna ewmée yūusa yuumeene'cue. ¹⁶Tyã'wēme', maái yu' ptammeesa canzh pcal yūuna fi'nzesa váa yuune'cue quijva ewsa's weचना ajtsena. Miijajcywe Esaua' tyã'wēc ewsa's wechsa yuu, teech ū' plaatu pa'garráa peecy wēt fi'nzewa'ja's tyweycu. ¹⁷I'cue'sha' peecy jiine'cue Esaua' tyã'wē yūuni e'su' ney bendiciona's qui' jypa'ga wēc, nava ūsnimeec yuu. Atsa' wala ñusna ū'nec, nava tyajy tyweyni's ma'wē yūurra yujva qui' caashwendu'jni yuume'.

¹⁸Israelwe'sha' Sinaí tjā'j vitste utyaaty cyte' ipy yuurráac seena' bejna ūsu', sa' seena' yuj wala ūucjūucj chji'ndyna ūsu'c cpi'sh we'weni na'wē susna. ¹⁹Sa' corneta susni vite' tyāawe'shtyi jycaajna we'weni's wala ūucjrra jwee yu' we'we caajmeeta'. ²⁰Tyāa jycaajni' na'wēc yu': Maava naa tjā'tje teech chindarráava tyajana tyã'sa' cuet wāatatajrra meerrava we'tju yājarrā icjwa'j yuuna, quij tajcy ma'c yuu nava jī'c. ²¹Seena' yuj ūucjūucjarráa vyaana ūsu'c, tyajírráac Moises yujva nal'jī: Ūucjnite yayanarráa ūstju jī'c.

²²Nava i'cue'sha' tyã'wēsaterráamée tjaacue seena'sa tashte utyasáa i'cue: Teech tjā'j Sion yaasesate Dyus ityisa ūsnite, cielute Jerusalen chjambte, angeleswe'sh iiméj seena' cujsa pcjaacjerra Dyusa's tuutje'jsawe'sh tashte, ²³Dyus luuch cielutewe'sh tashte, Dyus nwe'wenisawe'sh tashte, Dyus seena' juuna' jyucaysaty jycaajsa tashte, ²⁴Dyus u'se puuty we'werra nviitni's cytey cyū'lu'jwa'jsa Jesus tashte,

Abel ee na'wēsamée Jesus ee pcawnisa' tjaacue ewstate tyā'wēsa tashte utyasáa i'cue.

²⁵Tyāa pa'ga wala mpa'yajcywe, cue'shtyi we'wesa cielujuwe'sha's weechya'mée. Miiyajcywe, Dyus jycaajna we'weni Sinaíjūwe'shrrá's weechrrava iyumeeta', atsa' cue'sha' wejy iyuya' ājame'nja'w, cielujū yuu we'weni's nwēese'jya' wa'lrta'. ²⁶Dyus Sinaí tjá'j vitste we'weni' naa quiwe's quēese'cj. Nava āchja' tyā'wērrámée na'jī'c: Qui' peena tjaacue quēese'je'nja nava quiwerrá'smée, pety cielu yā'jrra quēese'je'nja jī'c. ²⁷Isa ew jiyute yu', qui' peena tjaacue quēese'je'nja jīrra', Dyus vitnisa ēsesa yu' jyuca ūshityna, atsa' ēsesaméerráa neeyūutyna jīrrane' tyā'jī'. ²⁸Nava Dyus tashte cue'sh ūswa'j yu' quēese'jnimée yuuna. Tyāa pa'ga Dyusa's wechana neewe'wega, tyajy dyi'pte ew yurráa yūuna. ²⁹Tyā'wēme', cue'sh Dyusa' jyuca iviituwa'jsa' ipy na'wēsa.

Dyusa's na'wē wechana fi'nzewa'ja'

13 ¹Teecha na'wērraj puuty peeygājna fi'nzewa'ja's pechcananuwe. ²I'cue'sh yat-su pa'jsaty wechana mpa'gawe. Tyā'wē yūusa' maaíia' angeleswe'sh yujtyva jiyunimeete jypa'ga'ta.

³Preesu ūssaty peeygājna mfi'nzewe, i'cue'sh yuu preesu ūssa na'wē yajcyana. Pcyuuni fi'nzesatyva peeygājna mfi'nzewe, cue'shva cacue ji'ptja'w na' naa quiwete tyā'wēy pcyuuni yuuwa'jsatja'w sūjna miiyajcywe.

⁴Cambarra fi'nzeni' wala yuj ewsa', tyāa pa'ga cambamey yu' pcal yūunuwe. Sa' cambayā'jrra', vitesa yacj pcal yūuna fi'nzewa'jme'. Tyā'wēme', Dyusa' castigaína tyā'wē pcal yūusatyi'.

⁵Vyurrá's yajcyana fi'nzewa'jme'. Ma'wēcuē ji'pjuni yacjrráava wēt mfi'nzewe, tyāa pa'gatey Dyus we'werra': Bagachte yujva i'cue'shrráa yuutyi'sa' nvijtme'nja jī'c. ⁶Tyāa pa'ga tyāa yurrá's pi'quiga, cytey pasyujuna sūjna na'jīna:

Dyusa' quijteva jyuca tyāa yurráac pu'chji',

Tyāa pa'ga wej yujva ūucjme'nja naa quiwete nasa ewmée yūusatyi'.

⁷Dyus yuwe pta'shsa i'cue'shtyi jype'jsaty miiyajcywe: Tyāawe'sh ma'wē ne'ta Dyusa's yajcyana fi'nze tyā'wēy mfi'nzewe.

⁸Jesucristo' bagachte yujva yu'ptjejsame'. Nyaffiiva ma'wēsaga yu', sa' āchva tyāaírrá', sa' bagachteva tyāaírráa nes yuuwa'jsa'. ⁹Tyāa pa'ga i'cue'sha' fiy caapiya'jni's nwēese'jna fi'nzenuwe, wejyva Dyus peeygāanirrá's ūuste jypa'garra chjāchja fi'nzeni ewsa', atsa' ū'nisu jycaajnisá' bagachte yujva selpiwa'jsame' tyā'wēsaty nwēese'jsawe'shtyi's.

¹⁰I'cue'sha' ew miiyajcywe altal ji'ptja'w tyā'sa'. Tyāa altaltewe'sha's ū'we'tsmeeta' cytee selpisaawe'sha'. ¹¹Pcalsawe'sh ju'ngu we'we pu'chsa judiu' tajcy icjnisa eea's Dyus yurráa ūsni jīnitec tyajya' jyūna ul'jue' jyucaysa pcaltyi peltunāyni yuucajn, nava tacy cacue yuutyi'sa' tyajū

jyūna u'ljrra ecajuty cambu'. ¹² Jesusva tyā'wēycu chjamb ecaju casejrra uuna ūsu', tyajy eeju nasaa pcaltyi' jyuca peltunāyya'. ¹³ Tyāa pa'ga cue'shva Dyusna neewe'wena ūsni yat nyafiwe'sha's nvijrra, Jesus yacj fi'nzeyā' casejega, tyāava ma'wēga pytjaa yuu tyā'wēy yaatseni yuuya'. ¹⁴ Cue'sha' nyafii ūsni yata's nvijrra, chjamb bagachte yujva ptsuwa'lsamée ūsna tyā'sna pacuena ūstja'w, naa quiwete' bagachte yujva ptsuwa'lsamée chjamb ji'pjmeetja'w naa pa'ga. ¹⁵ Tyāa pa'ga Dyusa's tuutje'jna nes yuuwa'j ji'ptja'w Jesucristo's pi'cyrra bagachteva. Dyusa's wechana tajcy icjrra cambupcachte, cue'sh ūusuj jyuca yajcyrra tyajy yase's cysusna wechana nes yuuwa'j ji'ptja'w. ¹⁶ Tyā'wē yūusa' quijrrāava i'cue'sh ji'pjuni's vitesaty jytyujndena fi'nzewa'ja's pechcananuwe, tyāa pa'gately tyā'wē yūuni'scu Dyusa' wechá'.

¹⁷ Sa' i'cue'shtyi caapiya'jna jype'jsatyi's cytey yuuna mwēese'jwe, tyāa pa'gately tyāawe'sha' i'cue'sh ūustyi vītuwe'shte tjengsata'. Tyāawe'sha' cielute Dyus tashte utyaarra pta'shwa'j ji'pjta', tyāasaty tyā'wē yū'. Atsa' tyāawe'sh mjiini's weechsa na'wē yuunuwe, ewrrāa yūuwa'ja's mpa'pchuwe. Tyā'wē yūumeete', tyāawe'sh mjiini' i'cue'shtyi's quijte yujva selpiimeena.

¹⁸ Quijteva ewrrāa fi'nze wēerra bagachte yujva pcalte yu' fi'nzesameetja'w, naa pa'ga cue'sh pa'gate Dyus yacj mpuutywe'wewe. ¹⁹ I'cue'shtyi's Dyus yacj puuty we'we jypi'qui'tj, cyaj Dyusa' andya's tyachmeyna qui' caashwendu'juna i'cue'sh yacj ūsya'.

Yuwe wechaa caajni

²⁰ Jesucristo' iiméj ew tyajy nasaty jype'jsa yu'c, tyajy eec tyā'wē u'se puuty we'weni bagachte yujva yu'ptje'jwa'jme's vitrra nviitni's cytey cyū'ju'jwa'jsa yuu. ²¹ Sa' Jesucristo uuteva qui' ityi vit-sa Dyusa' i'cue'shtyi's quijte yujva peejymée ewrrāa caafi'nze'jena, tyajy jytjāasni's cytey yuucajn. Sa' tyā' i'cue'shtyi ma'wē yuuwechteva cytey yuuna, Jesucristo pu'chte tyajy dyi'pte ew yūusa yu's. Jesucristo yuurráa bagachteva jytujtjesa yuuna.

²² Yacjtjē'jwe'shtyi neewe'we'tj, wa'lmée jypa'gacajn manz yuwe jyu'jmee'cuē yu'cypejna fi'jni's. ²³ Sa' pta'shitstju cue'sh yacjtjē'j Timoteo' carceluj tyjweteni yā'j ūsa', sa' dund vāa pa'jana, atsa' pe'jrra yuwe'nja i'cue'shtyi puuty uyya' yujrra'.

²⁴ Dyuus yatte i'cue'shtyi jype'jsawe'shtyi' jyucaysaty yuwe meen wechawe, sa' Dyus yacj fi'nzesawe'shtyiiva tyā'wēy. Italiajūwe'shva yuwe wechaa caja'ty.

²⁵ I'cue'sh jyucaysaty Dyusa' pu'chna nes yuuna.